1996年10月

## "子不语怪力乱神"正读

## 王清淮

内容提要 "子不语怪力乱神"一简,原有王肃、李充二读,王读从者众而李读知音少,于是李读淹迟,天下遂以为孔子所不语者乃四事,不知王氏误读《述而》也。原孔子言说,不避神怪,尚力戡乱,圣人本色,而"神话"初祖,孔子其一,所谓"不语怪"云云,非孔圣也。依夫子之志,检讨遗泽、旁求百家,知当依李氏:力不由理,斯为怪力;神不由正,斯为乱神。怪力、乱神之属,孔子所不语也。

关键词 孔子 《论语》 怪力乱神 王肃 李充

"子不语怪力乱神",《论语·述而》之一简也。名公巨儒,或以"怪力乱神"为夫子所不语之四事。而检讨孔圣,口不停言,手不辍编,所语所书,"怪、力、乱、神"比比矣。"子不语"云云,似非孔子语、孔子事,故袁珂谓之"触目惊心"。余虽不敏,而愚目所触,心亦有惊,惊而未死,反求诸己,竟豁然;后学误读耳。误读得歧义,无关乎孔子及游、夏之徒。

《论语》既成,秦汉儒者注疏颇勤,中有王肃,为之传,于"子不语"条则云:"怪,怪异也;力,谓若寡荡舟、乌获举千斤之属;乱,谓臣弑君、子弑父;神,谓鬼神之事,或无益于教化,故所不忍言。"[1] 王氏已以"怪力乱神"为四事,此四者,孔子或不忍言,或不屑言,或因"鼠器"之嫌而不便言,乃一言以蔽之,曰:子不语。王氏说出,天下景从,何晏《集解》此条不取郑氏及孔、包、马、陈、周说而详列王氏,知何晏、邢昺皆主王说。王肃素不喜郑玄,郑氏诸家说或已难明,于是王说笼罩群贤,于是"怪、力、乱、神",厌目充耳。虽然,终有达道者觉其扞格。"怪"、"力"、"乱"者,孔子不屑语容或有之,至若"神"明,孔子岂但"语"而已? 殊已喋喋矣。朱文公已见《注》《疏》之不密,遂分而论之:"怪异,勇力、悖乱之事,非理之正名,固圣人所不语;鬼神造化之迹,虽非不正,然非穷理之至,有未易明者,故亦不轻以语人也。"[2] 易"不语"为"不轻语",较汉儒为圆,然于孔子本意是耶否耶?故朱说圆则圆矣,通则未必。所语"怪、力、乱、神",果是孔子所"不语"耶?抑或后儒不许孔子"语"耶?他人有心,予忖度之,以为后者是。

夫四事,孔子多"语",存于简牍,布在方册,如次。

孔子语怪。《春秋》纪年,怪异泰伯,月食日晕,慧见地动,川竭山崩,孔子皆以为怪,郑重刻诸简。汉儒董仲舒发挥孔迹,创"灾异说",谓将有败政,天即出怪以示警。怪者,异也,异于常者。郭璞云:"凡言怪者,皆谓貌状倔奇不常也。尸子曰:徐偃王好怪,没深水得怪鱼,入深山得怪兽者,多列于庭。"[3]"肆尔多士",衮衮于庭,竟因获怪而致爵。徐偃王取"获怪"之士列于庭,孔夫子撷示怪之事列于史,事虽殊途,其理同归。防风氏骨"节专车";楚昭王渡江得"萍实",剖而食之,其味甘

美;"商羊"见舞,天将大雨,齐国因有备而幸免于灾。皆怪也。孔子于此,欣欣然颇有自得,以"博物"夸示于人;"丘闻之,木石之怪曰夔蝄蜽,水之怪曰龙罔象,土之怪曰羰羊。"又曰:"夫六畜之物及龟蛇鱼鳖及草木久者,皆神为妖怪,故谓之五酋,故物老皆为怪。"[4]且以传说为凿凿:"北方有兽,其名曰蟨,前足鼠而后足兔。"[5]然终孔子世,人未尝见此怪,故不知果然与否。仅此,可知孔子不唯曾"语怪",且喜语之。岂其孔子喜语哉?《吕氏春秋》引《商书》语曰:"五世之庙,可以观怪。"[5] 是圣贤经书亦竟语怪也。怪生于神,出于宗庙祖先,倘吕书所记不误,则怪也,神也,斯为一矣。

孔子语力。《国语·晋语》曰:"力,功也。"荀子曰:"力者,德之役也。"[1] 故许慎《说文》释力为"治功"。孔子长大孔武,其力可"举国门之关"[8],"勇服于孟贲,足蹑于郊苑,力举城阙"[9]。其不以力闻者,德掩其力名也。虽然,孔子不弃力:"合二十五人之智,智于汤武,合二十五人之力,力于彭祖。"[10]"射不主皮,为力不同科,古之道也。"[11]力或作能,孔子曰:"桓公九合诸侯,不以兵车,管仲之力也。"[12]"有能一日用其力于仁矣乎?我未见力不足者。"[13]力,与生来,又与之去,鬻子谓"力生于神"[14],力何必居贱位哉?孔子曰:"求!周任有言曰:陈力就列,不能者止。危而不持,颠而不扶,则将焉用彼相矣?"[15]是孔子尚力也。君子之力,以修德,以奉君,以养亲,以爱身,"行有余力,则以学文"。力不浪施,亦不悭用,此孔门"力"观之大较也。孔门若不用力,若子路之勇力,子贡之财力,子有之诈力,子须之田力,将无所知名。

孔子语乱。孔子作《春秋》"而乱臣贼子惧"<sup>[16]</sup>。乱臣贼子,崔氏田氏三孙氏之类也。田氏篡齐,孔子力说鲁哀公讨逆戡乱;三孙专鲁政,孔子以司寇之力,堕其三都。乱者,孔子所疾,既已疾矣,"焉避害"?孔子曰:"笃信好学,死善道,危邦不入,乱邦不居。"<sup>[17]</sup>"子言卫灵公之无道也,康子曰:夫如是,奚而不丧?"<sup>[18]</sup>"子曰:群居终日,好行小慧,难矣哉!"<sup>[19]</sup>"子张曰:何谓四恶?子曰:不教而杀谓之虐,不戒视成谓之暴,慢令致期谓之贼,犹之与人也,出纳之吝,谓之有司。"又曰:"尊五美,屏四恶,斯可以从政矣。"<sup>[20]</sup>四恶,即乱也。孔子著书立论,设席教授,或娓娓,或厉色,无非治乱二旨,以圣贤之治为师范,以乱臣悖君为殷鉴,孰谓孔子不语乱?

孔子语神。孔子自许殷人,尚"殷之辂",殷人尊天命而信鬼神。孔子曰:"郁郁乎文哉!吾从 周",尚"周之冕"。所谓"文"者,祭祀之诚敬,祭品之富赡,仪式之繁复也。孔子说诸侯,莫不诱之 以周礼,其心仪周礼,莫之或忘,至驰驱之暇,率弟子演习于木下。周人敬鬼神而远之,孔子远之 乎? 吾不知其远也。书曰:"惟尔有神,尚克相宁,以济兆民,无作神羞。"[21]诗曰:"怀柔百神,及河 齐岳。"[22]易曰:"天生神物,圣人则之,天地变化,圣人效之,天垂象,见吉凶,圣人象之,河出图, 格出书,圣人则之。"[23]礼曰:"牲牷礼采齐盛,是以无害平鬼神,无怨乎百姓。"[24]是经书不讳言神 也。孔子有疾,子路请"祷于上下神祗",子曰:"丘之祷久矣。"[25]是孔子不弃神也。祷如何? 孔子 曰:"祭如在,祭神如神在。"[26]祭"尸"如其神,虔敬诚笃,敬神如此,焉有加?以孔氏为"儒教"亦固 宜。老子曰:"谷神不死,是谓玄牝,玄牝之门,是谓天地根。"[27]神与天地共生而并存,神即天也, 天即神也。《礼记·礼器》"祭神之器"条注云:"神是天之别体",义略同。《吕览》云:"天神曰神,人 神曰鬼"[29],参差是。故刘向曰:"神灵者,天地之本,万物之始也。"[29]《礼记・祭法》曰:"山林川谷 丘陵,能出云为风雨,见怪物,皆曰神。"所谓神者,亦云泛泛矣。果如是,则大如天地,小至芥豆,皆 可曰神。释云:"狗子亦有佛性"。道云:道在屎溺。儒云:"与其媚于奥,宁媚于灶"[30]。佛、道、神, 在字在宙,孔子焉得塞耳摛目,彷徨于"无神"之境?孔子曰:"益士禄赏,则竭其力,尊天敬鬼,则日 月当时。"[31]天命鬼神尊显如此,孔子为殷人,确无疑义矣,孰谓"子不语神"?聪明正直是为神,孔 子是为神乎?倘孔子有神,当罪子雍以不肖也。

所谓"子不语怪、力、乱、神",显系误读误解"子不语"之简,其致误者,盖因诸儒未究《论语》构 章之秘也。此言即出,智者或以为大谬,其实不然。察《论语》一书,多有诸事并列者,或三四或五 六不等,而尤以四事居多。"子绝四:毋意,毋必,毋固,毋我"[32]。"子以四教:文、行、忠、信"[33]。 "子张曰:何为四恶? 子曰……"[34]。"志于道,据于德,依于仁,游于艺"[35]。前三条各以"四"明示 听者,使不致误解夫子之意也;"志于道"条所不举言"四"者,"句法一律"故也。不唯《论语》,辑孔 子佚言佚事诸书亦然:"何谓四灵?麟凤龟龙谓之四灵"[36]。"文王得四臣,丘得四友,吾得回也 ······"[37]。"王者前有疑,后有丞,左有辅,右有弼,谓之四近"[38]。"君子之道四,丘未能一焉;所求 乎子以事父未能也……"[39]。不唯孔子,秦汉诸子著论,以"四"行者亦多方此。尹文曰:"名有四 科,诗有四呈,一曰命物之名,方圆白黑是也……"[40]管仲曰:"国有四维。何谓四维?一曰礼,二曰 义,三曰廉,四曰耻。"[43]尸佼曰:"治天下有四术:一曰忠爱,二曰无礼,三曰用贤,四曰度量。"[43] 列御寇曰:"人自生至终,大化有四:婴孩也,少壮也,老耋也,死亡也。"[43]庄子亦云:"舜举三后而 四死除。何为四死:饥渴、寒渴、勤苦、斗争。"[41]依以上诸例,取王肃释义,弟子记夫子语应为"子 不语四:曰怪,曰力,曰乱,曰神"。或去"曰":"子不语者四:怪、力、乱、神",与"子以四教:文、行、 忠、信"同。惜乎门徒不与王氏便,竟不及"四",然而"怪力乱神"不为四事,明矣。至若三事,当不 在此限,子曰:"益者三友:友直、友谅、友多闻"[45]。是有"三"。"子所雅言:诗、书、执礼";"子之所 慎:斋、战、疾"[46];"子罕言利与命与仁"[47]。是无"三"。三言举三事,指示为易,故不必曰"三",以 避"架屋"之累。"子罕言"条规模绝类"子不语",乃有二"与"隔三字,以示三事,使不误为一或二事 也。子游子夏之徒,谨慎绵密,一至于斯,王氏诸儒不谙其苦心,妄以己意剖分圣言。己不昭昭,人 必昏昏,述圣如此,不亦悲乎?

原孔子本意,"怪力乱神"四字,仅二读,举二事,非四读四事也,二事者何?一曰"怪力",二曰 "乱神",断棼丝,斩荆棘,在此一读。李充曰:"力不由理,斯怪力也,神不由正,斯乱神也。怪力、乱 神,有与于邪,无益于教,故不言也。"[43]呜呼! 千载之中,独斯人得孔子心,斯语解士庶颐。孔子语 怪,语力,而不语怪力;语乱,语神,而不语乱神。怪力不由理,乱神不由正,孔子尚正与理,故不之 语。取李注,与孔子志合,与秦汉诸子书比,后生小子,亦不必苦心孤诣求证孔子曾语怪、神与否 矣。"怪力乱神",犹《山海经》之"蛇妖牛鬼",犹杜牧之"牛鬼蛇神",犹岘佣之"山妖木怪"也。"牛 鬼"、"蛇神",杜牧以状李贺诗,极言其诗险怪,似有鬼神掣肘制成章句。此鬼神非正非理,牛之鬼, 蛇之神也,依近代辞书,释为"牛头鬼"、"蛇身神",亦无不可。概而言之,"怪力、乱神"之类也。"怪 力乱神"既蒙误解,"牛鬼蛇神"亦受株连,十世以后,人读"杜序"竟茫无所知。恰"文革"风劲,"斗 士"见此语,雀跃而喜,遂派某为"牛",某为"鬼",某为"蛇",某为"神",牛、鬼、蛇、神,龟贯而游于 市,甫毕,槛入"牛棚"。牛棚者,牛、鬼、蛇、神居息处也,以"牛"领,余从略,全称则为"牛、鬼、蛇、神 之棚"。肢解杜牧, 挦扯"山经", 斯文扫地尽矣。作其俑者, 实为王肃。鬼、蛇、神三者, 侮之、毁之、 则已;若夫牛,厥志洁,厥行廉,厥食草,厥贡乳,亦何害之有?必欲死之而后止,无乃狂悖也夫? 《汉书·五行志》曰:"坤为土为牛,牛大心而不能思虑,思心气毁,故有牛祸。一曰,牛多死及为怪, 亦是也。"牛大心而不能思虑,非其罪也,牛死为怪,已是"牛鬼",与生牛无干,因其鬼而黜其牛,何 为大早计?人死辄成鬼,然班昭不因之豫见生人而惶悚走,故牛无其罪,"牛棚"可覆矣。

子不语"怪力"。何谓怪力?黄帝四面,夔一足,鲧窃息壤,禹化黄熊,蚩尤兴风伯是也。于此, 孔子或不语,或删削其怪而使之归于理,于是"黄帝四面"理为"黄帝四人","夔一足"理为"夔一而 足",诸如此类。 子不语"乱神"。何谓乱神? 王孙贾曰:"与其媚于奥,宁媚于灶。"[19]可知"春秋"之季,众神尚缤纷其盛,天子有其神,国有其神,家、室亦皆有其神(传以为"媚于奥"等为影射,关乎朝政,非是)。神既多,斯为滥,滥则不免于乱,乃有"乱神"也。天界神祇归于一统,势在必然,理在必须。孔子疾神界之淆乱,乃黜其乱神而升其"正神",故不语"乱神"也。乱神,孔书无载,《山海经》所列诸神,既滥且乱,可睹秦汉"乱神"之一斑:"(空桑之山)其神状皆兽身人面载船"[50];"(堵山)神天黑后居之,是多怪风雨"[51];"(光山)神计萦处之,其状人身而龙首,恒游于漳湖,出入必有飘风暴雨"[52];"(岷山)其神状皆马身而龙首"[53];"(丰山)神耕父处之,常游于清泠之湖,出入有光,见则其国为败"[54]。诸神或貌异,或性戾,皆乱神也。虽为乱神,亦当有自,谅非汉人臆创。灶、奥诸神,蔽天弥地,孔子终无一语及之。子不语乱神,此其信欤?

余少也贱,且困而不学,读书不及半卷,于圣贤经传注疏本不敢有言。唯唯,否否,乌得谓之无言?既已唯否,乌得谓之有言?虽然,抱残守缺,残缺或有快意;一叶障目,叶脉必可了了。小文既成,虽是敝帚,亦不敢自享,乃斗胆悬诸国门,以承利矢,至于纠谬补缺,切磋琢磨,尚祈海内博雅君子,辱以教我。

## 注释

- [1]《十三经注疏》本。
- [2]《四书集注》。
- [3]《山海经·南山经》注。
- [4]《孔子家语·孔子先世》。
- [5]《孔子家语·楚伐陈》。
- [6]按此语《尚书·商书》未见,《咸有一德》曰"七 世之庙,可以观德"。吕书或另有据。
  - [7]《荀子・富国》。
  - [8]《吕氏春秋・慎大》。
  - 「97《淮南子・主术》。
  - [10]《孔子家语·楚昭王》。
  - 「117[26][30][49]《论语·八佾》。
  - [12][18]《论语·宪问》。
  - [13]《论语·雍也》。
  - [14]《鬻子・贵道》。
  - [15]《论语·季氏》。
  - [16]《孟子・滕文公上》。
  - [17][45]《论语·泰伯》。
  - [19]《论语·卫灵公》。
  - [20][34]《论语·尧曰》。
  - [21]《尚书·武成》。
  - 「22]《诗·周颂·时迈》。

- 「237《易・系辞上》
- [24]《礼记·表记》。
- [25][33][35][46]《论语·述而》。
- [27]《老子》第六章。
- 「28 <sup>3</sup> 《 吕氏春秋・顺民 》。
- 「297《淡苑·修文》。
- 「317《孔子家语・齐侯问》。
- [32][47]《论语·子罕》。
- [36]《孔子家语·礼迹》。
- 「37]《孔子家语・子出卫》。
- 「38]《孔从子·论书》。
- [39]《礼记·中庸》。
- [40]《尹文子·大道上》。按:方圆白黑,异义对举,
- 了然在目与心,故不特言"四",一如东西南北不必言四方,喜怒哀乐惧不必言五情也。
  - [41]《管子・牧民》。
  - [42]《尸子·治天下》。
  - [43]《列子·天瑞》。
  - 「447《太平御览·皇王部》引。
  - [48]《论语正义》引。
  - [50]《山海经·东山经》。
  - [51][52][53][54]《山海经·中山经》。